



Sullualuup siunissami aqqusaalutarineqariartuaarnissaa sillimaffigalugu, sapinngisamillu annertunerpaamik periarfissaasinnaasunik atorluannissaq siunertaralugu nunatsinni umiarsualivimmik ilanngaaserisoqarfiunngitsumik nunanit tamanit atorneqarsinnaasumik (international frihavnimik) sanaartortoqarlunilu pilersitsisoqassappat suut pitsaaqutaallutillu ajoqutaasinnaanersut Naalakkersuisut nassuiaasiornissaat pillugu Inatsisartut aalajangiiffissaattut siunnersuut. Nassuiaat EM 2021 naammassineqassaaq.

(Atassut Inatsisartutgruppe)

(Siullermeerneqarnera)

Ukiorpasuarini oqaluuserisimavarput, Sullualuup aqqusaalutarineqartalernissaa periarfissanngorpat uagutsinnut aningaasatigut iluanaarutaasinnaassasoq.

Demokraatit taamatut isummerneq isumaqatigaat, aammalu isumaqatigaat umiarsualivimmik ilanngaaserisoqarfiunngitsumik nunanit tamanit atorneqarsinnaasumik pilersitsinissaq isumassarsiatsialaasoq tamanna pisariaqalerpat.

Umiarsualivik ilanngaaserisoqarfiunngitsoq nunanit tamanit atorneqarsinnaasoq (international frihavn) maani nunatsinni tassaasinnaavoq, umiarsuaatillit usiminnik ilanngaaffigalugulu usilersoqqiffigisinnaasaat. Umiarsualivik taamaattoq umiarsuaatillit soqutigisinnaavaat, Sullualukkoorneq angalanerup sivikillineratigut aningaasarpasuarunik sipaartissinnaammagit.

Taamatut oqareerluni, mianersuuttariaqarpoq sulii piviunngunngitsoq iliuuseqarnissaq miannersuuttariaqarmat.

Tunngavissaqanngilaq sanaartugassanik akisoorsuarunik aallartitsinissaq sulii ilisimanagu, qaqugu pilersaarut aallartissallugu tulluarnersoq.

Pivusoq unaavoq, ilisimanginnatsigu, qaqugu Sullualuup aqqusaalutarineqarsinnaanera periarfissanngussanersoq, tamanna apeqqutaammat, umiarsualivimmik ilanngaaserisoqarfiunngitsumik nunanit tamanit atorneqarsinnaasumik sananissamut.

Taamaattumik piffissaanngilaq maannakkuugallartoq nassuiaasiornermut aningaasanik atuinissaq. Teknikkikkut ineriartorneq sukkaqisoq, taamaattumillu ilimanarluinnarpoq, umiarsualivimmik ilanngaaserisoqarfiunngitsumik nunanit tamanit atorneqarsinnaasumik sananissamut nassuiaat nutaanngilipallassinnaasoq.

Akerlianik Demokraatit kajumissaarutigissavaat, Naalakkersuisut Sullualummut tunngatillugu ineriartorneq malinnaaffigilluassagaat, tassungalu atatillugu piffissami eqqortumi eqqortumik alloriarnissaq utaqqimaarlugu.

Tamanna tunngavigalugu siunnersuutip itigartinneqarnissaa innersuussutigaarput.



DEMOKRAATIT
DEMOKRATERNE